

四庫全書

集部

欽定四庫全書

集部

范太史集卷四十三
四

詳校官庶吉士臣何道沖

檢討臣何思鈞覆勘

總校官進士臣楊懋珩

校對官中書臣嵇承志

謄錄監生臣蔣錦城

欽定四庫全書

范太史集卷四十三

宋 范祖禹 撰

墓誌銘

寶文閣待制鄭公墓誌銘

元祐六年五月寶文閣待制國子祭酒鄭公穆三上表
乞骸骨天子以提舉杭州洞霄宮祿之而不煩以政敕
過門下給事中范祖禹奏疏曰穆雖年過七十精力尚
彊自為布衣閩中士人稱四先生穆其一也平生歷官

多掌學校在王府十餘年持身清謹未嘗有過擢居左
省論議不苟復為祭酒多士矜式旋觀其人終始無缺
年耆德茂力求引去在穆進退誠為可榮而為朝廷計
則可惜也古者大夫七十而致仕人君未_闕許之故有
不得謝者則賜之几杖安車自虞夏商周皆然也祭酒
為國子師非藉其筋力趣辦職事正宜用老者為之不
必拘以年願留穆舊職以示朝廷貴老貪賢之美不報
太學諸生千餘人以狀詣司業又詣丞相府請留公亦

不報公將行公卿大夫多為詩以贈之三學之士皆為
詩空學出祖供張汴東門外三獻酒再拜堂下學官拜
堂上辭訣而去都人觀之嘆息曰所未見也公至杭州
明年正月告終于皇華館年七十有五將葬子璆使人
來請銘祖禹接公於館閣又為僚於左省實知公者其
何以辭乃序而銘之公字闕中其先光州固始人唐末
高祖為王潮所虜入閩遂死之子孫家福州今為候官
人曾祖諱某祖諱某皆不仕考諱某以公貴累贈正議

大夫妣曹夫人以賢孝稱於鄉黨生公及一兄一妹嘗教之曰汝曹當各為世人矩範乃足吾志追封文城郡太君公醇懿端謹出於天資始志學閉門讀書或累月不出至忘櫛沐進退容止必以禮與鄉人陳襄陳烈周希孟為友皆力古人閩中號為四先生天下聞其名鄉閭及四方之士稱弟子者以千數舉進士廷試不第居正議喪哀毀盡禮既葬將廬於墓而終焉門人族屬敦勉且告以正議遺命乃復有仕進志皇祐中再至京師

六試於有司四為第一登進士末科初仕為河南府壽安主簿詔任滿以為國子學官至壽安不數月西京留守王舉正奏為西監直講久之闕前詔召為國子監直

講除編校集賢院書籍歲滿

闕

館閣校勘累遷太常博

士乞納一官先南郊追封考妣許之改集賢校理求外補得通判汾州神宗熙寧三年召為岐王侍講嘉王出閣改諸王侍講時王府官猶缺員陳襄為御史知雜事因進對言府僚不可不慎擇人神宗曰如鄭穆德行乃

宜左右王也公居館閣三十年非公事不及執政之門
在王府一紀每講說可為勸戒者必反覆極陳之二王
深敬禮焉元豐三年請外任知越州特遷朝散大夫至
則修校舍飾先聖像帥厲學者先是鑑湖以旱乾民多
田於其中延袤百里官籍而稅之既而連年水溢民逋
官租積至萬緡公悉奏免之未滿秩告老差管勾杭州
洞霄宮上即位元祐元年入為國子祭酒三年揚王荆
王請為侍講罷祭酒除直集賢院復入王府荆王薨為

揚王翊善太學諸生上書乞公為師復除祭酒兼徐王
翊善四年拜給事中兼祭酒人曰鄭公長者居門下必
簡靜公遇事抗直無所避士論益多之請解祭酒許之
五年除寶文閣待制復為祭酒公自為直講及祭酒諸
生請問祁寒大暑必朝服接之童子進見亦以禮迎送
諸生尊其經術安其教訓心悅而誠服之其成就人才
為多都官郎中張景晟公妻兄也將死遺公白金五百
託其孤公曰託孤吾所願金豈宜有哉歸金而恤孤皆

得其所先妻陳氏樞密直學士襄之妹早卒追封永福
縣君繼室張氏太常丞師雄之女封同安縣君陳夫人
生一男三女男曰璆通州軍事推官女長適楊子令張
溥次幼亡次適左宣德郎林敷先公卒孫男二人峻畛
女一人公之東歸也過廣陵愛其土風淳厚復邇先世
之居曰即此亦吾之故鄉也買地築室於州之積善坊
及公歿璆遵遺命以其年八月某日葬公於江都蜀岡
之原銘曰

有宋醇儒曰鄭先生幼壯及老惟一以誠鄉黨高其風
天下仰其名王府求傳學者求師天子不違皆以畀之
惟其道德衆之所資有始有終無愧幽顯銘公之蹟以
勸為善

集賢院學士致仕高公墓誌銘

公諱賦字正臣唐中國公士廉之後五代祖官於中山
因為中山人曾祖整不仕祖柔贈左神武將軍考尹右
衛將軍累贈太尉母某氏某郡太君所生母楊氏累贈

遂平郡太君公以太尉蔭補右班殿直景祐中登進士
乙科改授奉禮郎四遷太常博士累太常少卿神宗即
位遷光祿卿特拜祕書監賜三品服加直龍圖閣進集
賢院學士元豐官制易中大夫今上即位遷太中大夫
以通議大夫致仕公初為武爵非其所好力學中第乃
仕知真定府真定縣通判劍州成德軍邢州石州知慶
成軍衢唐滄路蔡廬郢七州提點陝西河東兩路刑獄
判尚書司封太常寺提舉萬壽觀最後守郢求閒局再

提舉崇福宮遂請老公在成德永寧軍雲翼兵謀作亂
公密知之以白主帥主帥委公平其事人遂以安先是
保州軍亂掠公私金帛萬計檄公往受而復散之皆得
均一以其事聞朝廷旌賞焉慶成地狹民困於役殆無
虛歲多破產者公言於朝十減六七民力遂寬城東歲
被水患募民築堤禦之軍城獲安衢民好巫鬼毛氏柴
氏二十餘家世畜蠱毒有小忿即毒之每閏歲殺人尤
多公命擒捕伏辜者數人蠱毒遂絕饒州有冤獄更累

守不能決公奉制推鞠不數旬而辦人皆服之婺州民相率詣轉運使請徙公易其守唐州土曠民寡歲入至薄公以治平元年至郡取圖籍考之自唐乾元時領縣七戶四萬二千六百四十有四歷五代亂及本朝承平今領縣四戶六千一百五十有五公相其川原曰是皆沃壤可闢而人力不至與棄之無異募兩河饑民計口與田比公罷歸增民萬一千三百八十戶給田三萬一千三百二十八頃而山林榛莽之地皆為良田歲益稅

二萬二千二百五十七作陂堰四十有四詔書獎之曰
召杜南陽世稱循吏其亡久矣朕尚思之卿招懷饑流
墾闢荒梗繕修陂竭績效具昭前人之良何以遠此公
再治唐凡五歲與前守趙尚寬皆蒙褒賞天子諭執政
曰尚寬等在唐闢土疏水招輯民戶殆無曠土已有成
效宜宣布治狀加職以勸天下公自直龍圖閣至集賢
院學士皆朝廷嘉其墾闢之功也中人程昉以帶御器
械領都水外監丞奏請於滄州境開西流河口引水河

卣州城西入北流河灌三塘泊公時守滄州執政先以書抵公意其協力公以謂大河迫州城歲增隄防猶恐奔溢不可妄引不從昉議然昉卒開西流河費工鉅萬而功亦不成昉方以貴近用事執政者主之公力排其說後昉數以事据公而卒不能得公上言二府大臣或就舍委巷散處京城間有第宅亦公私非便宜倣前代丞相府於端門前列置大第俾執政居之又言仁宗時兗國公主下嫁一第之費緡錢數十萬它物稱是臣聞

禁中今有大長主長主凡五人若皆以克國為比則其費無極乞講求前代及祖宗時典故取中制為定式俾有司守之又言國家置提點刑獄司蓋欲平反獄訟使民不冤自罷武臣以來多止一員兼河渠農政常平盜賊兵甲而刑書繁多省閱不給若委之吏則為大弊請逐路置檢法官以專平讞疏駁又言漢有雲臺唐有凌煙閣皆圖功臣祖宗有天下以來文武之臣有大功者不為少而繪像之制未聞宜於禁中建閣圖寫命詞臣

為贊事多見施行公雖歷顯仕家無餘貲退居襄陽元祐七年冬十月戊寅以疾終享年八十有四有白雲集十卷雜文十卷奏議五卷刀筆二十卷事類書抄一百

卷娶某氏封

闕

郡君三子曰興嗣未仕曰興仁

闕

京

副使皆先公卒曰興禮北京畱守推官一女適進士李齊孫五人傳正三班借職傳式傳行皆郊社齋郎傳慶傳道未仕孫女六人公歷內外官幾六十年天資強力無一日少懈為人剛嚴內實平恕所居皆有善政吏民

紀之衢唐二郡民為立生祠云八年九月丙申葬襄州襄陽縣順德保檀溪之陰夫人某氏祔余從祖父奉議郎嘗為公掾屬公深知之公既歿其孤因奉議以狀求銘於太史氏余不得辭銘曰

余觀熙寧中天子方留意民事興農田水利遣使者四出冠蓋相望當此之時士大夫爭言功利然考其實未能如所言也唯高公自治平中孜孜民政招懷流亡戶口歲增發於誠心勞來不怠與夫希世而為之者異矣

故詔書最先褒賞數進職秩以風天下之吏比之召杜豈虛乎哉嗚呼高公施實德於民而見知於人主生有顯榮沒有遺愛名垂後世為宋循吏凜凜古人之風烈矣

長壽縣太君聶氏墓誌銘

夫人聶氏其先太原人曾祖遵美贈大理評事徙居陳祖詠右補闕贈尚書刑部員外郎父震太常博士祕閣校理母呂氏永樂縣君校理以德行文學名一世生五

女皆適士大夫之賢者夫人其季也年十七歸郝氏郝公諱戴蔡人也夫人之歸諸姊之夫皆已官達郝公家世清白篤行苦節夫人安於淡泊若將終身郝公晚登進士第為通山令年五十以父耄老上書辭祿守太子中允致仕請蔭授父官未及命而丁憂居喪毀瘠負土起墳廬墓三年乃還家詔賜粟帛大臣交薦朝廷累降告命起之郝公志不可奪所親或勸夫人公方年踰知命盡勉以仕乎夫人曰吾不德無以助君子矧敢強其

所不欲以累其高哉郝公終辭不受由是得贈父大理
寺丞母斛斯氏繼母顧氏冉氏田氏皆追封縣太君夫
人事舅歷事皇姑前後如一皆以孝聞聚族衆多接之
禮意得宜郝公三妹在室夫人愛養過於已子夫族有
甚貧者日周其急斥奩具以繼之嘗飭家人曰事能忍
則何所不利至於妾御亦不加以聲色中外未嘗有間
言教諸子泣官守法廉慎平恕勿為苛察故諸子從政
所居稱治所去見思夫人從夫封長安縣君以長子升

朝進封長壽縣太君元祐八年九月戊戌終於河南府
福昌縣季子之官舍享年七十有九四子皆力學長闢
之及進士第累官左朝奉郎大宗正丞闡之右宣德郎
知汝州郟城縣事皆先卒問之河南府永安主簿閱之
鄉舉經明行修為福昌尉二女長適進士董詵早卒次
適鄉貢進士李祐孫男女二十九人曾孫一人夫人之
沒福昌吏民往往聚哭盡哀喪歸蔡過郟城次子舊治
邑人輟耕罷市弔酹而哭皆曰此善教其子者也夫人

不出閨闥而仁心所感如此其年十一月甲申祔於西
平縣明化鄉德化里郝公之墓初夫人伯姊嫁天章閣
待制司馬公池是生太師溫國文正公夫人既葬季氏
以左朝請郎元某之狀來請曰先君之葬文正公銘其
墓惟吾母之行不可以隱晦不聞願為之銘余諾而銘
曰

惟古君子必有賢配敬修於家由內及外猗歟郝公孝
感神明實惟夫人輔以至誠克成其夫又訓其子立朝

居官是有是似天錫之報壽考令終子孫振振不墜素
風默婁之妻孟氏之母夷考夫人無愧于古

集賢院學士知潞州朱公墓誌銘

公諱光庭字公掞河南偃師人曾祖琪贈衛尉少卿妣
甯氏安陵縣太君祖文郁尚書主客郎中贈工部尚書
妣孔氏河南郡太君高氏許昌郡太君考景光祿卿贈
太尉妣宗氏崇國太夫人李氏會昌縣太君公太尉長
子幼好學十歲能屬文賦詩有警句尚書拊其背曰大

吾門者汝也得任子恩辭以與其弟尚書益奇之嘉祐二年登進士第調萬年主簿數假邑事邑人謂之明鏡時程伯淳主鄆縣簿張山甫主武功簿與公皆以才名稱關中號為三傑遷臨晉令以太尉疾解官侍養太師文潞公舉公應制科會仁宗登遐罷試丁李夫人憂服除為號略令又丁太尉憂終喪為修武令邑有牧地民久侵冒轉易皆為稅籍朝廷遣使案畝加租總四萬餘石公爭之得減萬餘石修武廢為鎮民以為不便公力

爭不能得察訪官欲奏留公領鎮事公辭之改垣曲令
他邑斂青苗錢類以嚴督取辦公不答一人而輸以時
足代還改著作佐郎今范丞相帥慶州辟簽書判官樞
臣薦公得召對神宗問所治何經公對以少從孫復受
春秋又問中外有所聞乎公對曰陛下即位以來更張
法度臣下行之或非聖意故有便有不便誠能去其不
便則天下均被福矣用上殿恩得簽事河陽判官今呂
丞相守長安辟簽書判官朝廷伐西夏五路出師雍為

都會事多倚公以辨調發有非朝廷意而急於期會者公每執白不從部使者怒宣言將加以乏軍興罪公請督治嶽祠以避之亦賴呂公力護獲免官制行改奉議郎代還簽書湖州判官遷承議郎今上即位遷朝奉郎賜五品服神宗山陵韓獻肅公守洛奏公勾當山陵事事以時集洛人不知有大役用司馬文正公薦召為左正言首以辨大臣忠邪為言又請天子燕閒與儒臣講習罷提舉常平司官不散青苗錢廣儲蓄備水旱太學

置明師以養人材論奏無虛日多所薦達人無知者太
皇太后嘉公正直問公民已蘇息未愛民當如赤子朝
廷自非臺諫公正執政得人一人耳目何由盡天下事
又諭公薦賢不當避親避親則有遺賢朝政闕失當安
心言之勿畏避公自以遇二聖之知夙夜竭力知無不
言時進退大臣損益政事公密勿啓沃多見施行遷左
司諫請罷遣使高麗褒崇先聖增錫土田別異世襲論
急務十事一議官制二罷保甲三糾合宗室四省浮費

五罷京師倉法六汰冗官七議河患八慎數易吏以省
送迎九懲獄官慘酷十禁淫祠河北饑遣公賑濟大發
倉廩所全活甚衆改左司員外郎遷太常少卿除侍御
史議明堂請天神悉從祀諸陵薦新復祖宗之舊西戎
疆場不可許以城寨拜右諫議大夫賜三品服請召講
官便殿訪以治道是歲旱論救災十事遷給事中有詔
幸後苑賞花釣魚燕羣臣會春寒公請罷燕以祇天戒
其夏日食上疏論修德應變乞戒諸州讞獄毋得為疑

似之言以論事求補外除集賢殿修撰知亳州數月復
召為給事中劉丞相罷政守鄆公封還麻制坐落職復
知亳州歲餘復修撰知潞州遷集賢院學士紹聖元年
三月辛丑晦以疾終于官年五十有八公天性純孝居
太尉喪廬墓側三年事叔父盡其道教諸弟以友愛上
下惇睦靡有間言為人端厚方重望之可畏即之謙恭
虛已常若不足修身治家居官立朝與朋友交一以至
誠再守毫毫人懷其德為之立祠毫大饑公開倉賑濟

量口給粟五月而止民無菜色在潞以鄰境荒歉流民至者相踵公勞來安定日為食以食之一日食饑者至暮不暇食遂感疾猶強視事未終前二日親禱雨拜不能興憂民之心瞑而後已初受學於安定胡先生告以為學之本主於忠信公終身力行之後又從程伯淳正叔二先生於洛陽其所聞以致知格物為進道之門正心誠意為入德之方公服行之造次不忘見善勇若賁育唯恐不及見不善如避水火嘗謂百世以俟聖人而

不惑者唯孔孟為然故力排異端以扶聖道家資素厚
所取甚薄仕至朝列猶糲食不足後歷清顯其自奉如
故時娶王氏衛尉寺丞恕之女封壽仁縣君子男三人
純之假承務郎二早夭四女長適洛陽尉范鎬次適三
班奉職時操先公卒次適河中府教授程頴次許嫁假
承務郎王康民孫男二人完假承務郎宏幼有諫疏文
集若干卷其年五月壬寅葬河南偃師祁村北原先塋
之次弟左朝奉大夫光逢與孤純之請銘余昔友公于

洛又為僚于左省公余之所畏也銘其可辭銘曰

嗚呼公挾誠明篤實行直而方居則慎獨靡有作輟道
學之強正色於朝見義能勇志氣之剛我思古人庶見
來者今也則亡其名在人其事在史愈久而光祁村之
原前洛後邛永固其藏

范太史集卷四十三

欽定四庫全書

范太史集卷四十四

宋 范祖禹 撰

墓誌銘

資政殿學士范公墓誌銘

紹聖元年四月詔以資政殿學士太中大夫知河陽范公知河南府畱守西都既拜命閏月壬申以疾薨于河陽府居之正寢年六十有五訃聞上輟視朝一日賻卹有加以右銀青光祿大夫告公第其年七月己酉葬河

南偃師縣洛南鄉土中村天池原范氏之先本家長安
唐末避亂徙蜀為成都華陽人公諱百祿字子功曾祖
諱璲贈太保祖諱度贈太師考諱錯以衛尉寺丞致仕
贈太尉曾祖妣張氏祖妣李氏龐氏妣郭氏追封嘉漢
唐昌四國太夫人太尉五子先公中大夫為長公其季
也少穎悟秀拔力學不舍晝夜季父忠文公文章為一
世所宗太尉攜公入京師忠文哥之曰廊廟器也年十
六游太學諸生少之已而文詞聲名在千百人上衆乃

驚服舉進士中第釋褐為應天府楚丘主簿渦河役民
夫數千人公拊循愛養不一月工畢縣人德之相與為
佛事三日為公謝以薦者為懷州武德令丁太尉憂服
除調綿州龍安令遷秘書省著作佐郎舉才識兼茂明
於體用科治平中京師大水制策降問時執政方議尊
濮安懿王公對以五行傳簡宗廟廢祭祀則水不潤下
昔漢孝哀尊共王而河南潁川大水孝安尊德皇而京
師及郡國二十九大水孝桓尊崇皇而六郡地裂水涌

井溢又曰大宗隆也小宗殺也天地宗廟之祀重也門
內之私輕也宜殺而隆之宜輕而重之則不得於先王
之禮不得於先王之禮則不得於人心不得於人心則
不合於天意此變異之所從來也又陳十二事以勸上
德考官第策入三等英宗親覽嘉嘆欲不次用之為執
政所惡遷一官以祕書丞知彭州濠陽縣國朝制策三
等惟吳育蘇軾及公凡三人焉丁昌國憂終喪知開封
府咸平縣御史中丞鄧綰舉公御史召對固辭神宗從

之擢提點江南東路刑獄發運司應詔于江池等州市
木修金明池橋梁郡縣以戶等科之民以為患公奏曰
陛下勤儉之德出於天縱今有司乃以方土所無有而
求市於民恐官吏督責或有不堪其求者矣詔即罷之
徙利州路閬州兩稅外有新稅自唐僖宗優山南免其
稅移之閬中由是山南輕而閬重公請免新稅歸山南
利守用武臣有周永懿者以賊虐敗公又言至道前文
臣知利州其後以右職兼監益利兵轄文龍邊界令領

郡政名實兩失乞選文臣知州而武臣監路分兵則名
分正事任一皆如所請瀘夷犯涪井官軍覆敗選部使
者經畫其事徙公梓州路加直集賢院既而檢正官熊
本為察訪專節制使者聽于軍所羅箇墓夷數千人窮
蹙請命裨將賈昌言貪功欲屠之公諭以殺降之禍未
聽亟見本謂之曰活千人者子孫必封彼以窮歸我而
君將殲之乎本矍然遣屬官程之元持檄畀昌言受其
降召還同知諫院歲荒民流公三上奏乞以清閒之燕

召政府大臣詰其所因使各書以對所以勞徠安輯之
策又言民方困苦而定令未已有手實告匿之法有保
甲給請之制臣謂治務有先後理勢有緩急今不先安
民而亟欲行法前日之令固有未便設復為此而至于
擾則周之餘黎不殆乎靡有孑遺也哉乞以臣前後奏
疏諭大臣使講求今日之急務收還法令之未便者以
救將死之民公在言路不為訐激朝廷小事有所不言
所言多天下大計上亦以是知之時郡縣常平或不知

發或增價與民爭糴或自為閉糴之令河南開封諸邑不恤荒凶而督累年逋負決河淤田而平原沃壤反有浸灌之害公悉以聞又論手實法曰造簿手實告匿有賞為是法者欲民之均推而行之恐必不如法意而至騷動此生民治亂之所繫也戶令雖有手實之文而未嘗行蓋謂使人自占理必不盡而明許告言則家家有告訐人人為仇怨禮義廉恥其可得乎設若役錢由此暫均而使四維乖失所損孰大其後手實竟罷常平

法行郡縣吏有誑誤輒以罪去公奏曰立法之始既要之以謹嚴成物之終宜濟之以寬易請薄其罪使得自新五路兵置三十七將選拔或非其人事任過重且許辟召布衣為參謀公上疏曰今大將未命而已除將佐有以勲蔭恩澤用有以瘰敗收有未嘗歷邊任經戰陣有以故羣盜得官而才無聞有碌碌無他能適以幸會有微功而遷官願詳覈其素若功與夫舉者當否之實校其所長參而伍之又列其甚無狀者十有四人姓名

以上且曰付之新格責以訓練給銅符以備差法賜鎧甲以寵軍容所在長吏不得而預然匪人十數麤暴之才雖一夫之勇但可為人指蹤而未可蒞衆也況又委之辟使臣許以察官吏小人處此必有乖忤識慮無取紀律不明五千之兵何所不至乞依畿縣舊制將佐專部分教閱餘即付之州縣而罷參謀上善其言皆見施行選人鄭俠上書言事語狂悖付諫官御史雜治公請對奏曰連逮者衆或可寬宥願諭治獄之臣戒其延蔓

帝覽奏色厲曰俠詈朕公對俠狂生安足為陛下輕重
以天地之造誠能容貸適足以增重聖德帝改容嘉納
詔趣具獄執政有忌公者絀諫官班以沮之公奏曰國
朝兩省官不必正員行其事則立其班所以明分職厲
官守今修起居注直舍人院則綴兩省知諫院則絀而
不與詔如舊執政愈不悅會公與御史治趙居獄妖人
李士寧嘗以仁宗御製詩贈居母有后族意及許與刀
飾以龍方訊鞫而宰相素與士寧厚善御史徐禧言公

鍛鍊士寧罪公奏士寧熒惑愚婦狂童以致不軌當誅
無赦禧縱出有罪以媚大臣不可以任風憲朝廷以御
史知雜樞密承旨辨曲直主者直禧公坐落職奪一官
監宿州酒稅久之上察其非罪就除提點淮南東路刑
獄徙知唐州官制行為司門郎中遷吏部元豐七年除
起居郎明年召試遷中書舍人司馬溫公議復差役法
公謂溫公曰熙寧初某為咸平縣役法之行罷開封牙
前數百人而民甚悅其後有司求羨餘務剝為法之

害今第減出泉之數以寬民力可也溫公不從及議郡
縣吏因差役受賕從重法加等配流公押刑房固執不
可且謂鄉民被徭役今日執事而受賕明日罷役復以
財遣人既以重法懲之將見當黥衣赭充塞道路矣溫
公曰微公言幾為民害遂已之是年冬使遼接伴蕭祐
曰南朝皇帝何以樂公曰崇高富貴復何言哉又曰打
圍飛放否公曰無有也上日出視朝近臣奏事百官各
以其職進已而御便殿召儒臣講讀經史燕息則覽中

外章疏以修政事此所以為樂也祐嘆服次會同館說
儀制公為右番國信使引左番而不問皇帝聖躬公曰
儀未盡也何獨問太皇太后而不及皇帝必正之乃可
館伴梁援曰此萬世法不可改公曰是豈可為法者耶
反覆詰問敵屈而從之遂兩宣問使還權刑部侍郎有
以強盜及故殺鬪殺情可矜者讞於朝法官援例貸免
而溫公謂宜論死公請問言之溫公曰強盜可憫也殺
人不死則法廢矣公以書辨之曰謂之殺人則可制刑

而謂之不疑原情而謂之無可憫則不可今予之死則
二殺之科自是無可疑與可憫者矣天下之獄歲以萬
計如是而殺之則死者不亦多乎溫公復書曰鬪而救
死尚可貸也因田稼而殺人牽牛蹊田奪之牛且不可
況殺人乎此介甫鶴鷄獄也公又曰昔楚子滅陳而縣
之申叔時惡其滅人之國而欲復之也故有蹊田之譬
設有此訟不過還之牛而息訟矣今也初無殺之之心
非若利于得牛而有之也遂寘之死與還之牛豈不異

乎恐遂為例則差之毫釐後將噬臍其可得耶溫公不能奪卒從之朝廷以公議獄持平真拜刑部侍郎先是元豐八年冬詔天下奏獄不當讞者案其罪有司重請讞斷刑峻密至有枉情以合法者公奏曰熙寧之令非疑慮與可憫而輒奏者免駁勘至元豐刪去之去年詔書不得用例貸配有不當即奏劾自是官吏畏罪不憚論殺因以元豐六年至元祐二年冬十月終死者貸者之數以聞明年奏獄門下省多駁正當貸者皆欲殺公

屢以告不可退又與執政書論之執政不從大理官亦以書勉公從執政意公復書責之執政怒言于上有詔例在有司者收還中書置檢例官二人使議去取閱刑部大理所奏疑慮若可憫情法輕重之狀有異同各以上公自以不得其官三奏乞外任不許上疏極論其事疏奏悉如公請既宥諸囚而例復歸刑部自是中外奏讞無所避如執政前所欲殺者皆得擬例從貸免逮今八年其所活不可勝計矣遷吏部侍郎右選官冗累歲

乃得調既赴官而宗室許占射成資即罷去為筦庫者
患之公奏請宗室員外置不獨恩厚公族且使在官無
非次替移之怨時患員多無以注公檢索諸路久闕員
而州不以報者百餘所亟補之人情悅服外選所以便
遠官久而有僥倖公請用集注法人皆以為宜領詳定
省寺敕令公患吏胥猥冗議加澄汰以白宰相宰相遽
欲廢其半公不可曰失職者衆法必不行莫若以漸銷
之自今犯法及死亡皆勿補不數歲所減過半矣宰相

不從於是胥吏之去者怨讟囂然至有棄妻子凍餒而死者吏額書成賜金帛公固辭朝廷從之初元豐四年河決小吳元祐初水官請於北京之南開孫村口引河還故道宰相主之朝論異同不決三年冬命公與給事中趙君錫同行視公歷東西二河觀地形究利害而東流高仰北流順下河不可回中途即馳奏至黎陽閱舊牘得神宗詔都水使者李立之曰河決小吳東流故道已淤高理不可塞宜勿復開決口俟見大河歸納修立

隄防公又以所得先帝詔書并陳之時宰相多以回河
為便見公奏不悅既還尚書省以詔旨問利害且謂大
河東流為中國之險要自大吳決由界河入海既壞塘
濬又界河淤淺則河必北流注敵界失險阻之限公奏
曰塘濬雖有限河之名而無禦敵之實今之塘水又異
昔時淺足以蹇裳而涉深足以維舟而濟冬寒冰堅尤
為坦途如滄州等處商胡之決即已淤澱今四十二年
迄無邊陲之警亦無人言以為深憂自回河之議起首

以此為辭是欲動朝聽煩聖慮若謂河注敵中失險阻之限是大不然何者大吳初決水未有歸猶不北去今河流八年矣入海遄迅界河益深誠不宜過慮設有此則中國據上游北人豈不慮乘流而擾之乎自古匈奴入漢之路朝那蕭關雲中朔方定襄雁門上郡太原右北平之類無險而不入豈塘灤界河之足限也哉及進對二聖以公之言然退詣政事堂大臣曰河不北去可必否公曰累章論列如之何不可又十數日而未有定

議公再上疏極陳其不可且謂本朝河決必塞已塞復決未嘗復回於故道也今河行大岨之西至于衡漳北過洺水至於大陸趨徒駭分注木門由閭官道會獨流口入界河東歸於海合禹之蹟前人欲為而不可得者也元豐以前未有回河之論八年以後乃有橫議王孝先俞瑾輩緣旁以自進爾臣既案視究見利害而大臣廷議踰月未決臣竊惑之況小吳之決先帝神幾審斷不下堂而見萬里之外順天地高卑之性知百川脈絡

之理明詔中出藏在有司大畧以故道淤高理不可復
更不修塞遠近心服人無異論今一孝先乃敢妄議乞
罷修河司以省大費正孝先瑾之罪以明典刑疏入即
降付外詰朝執政奏事二聖諭以亟罷河役詔下如公
奏初欲為是役調夫費財其用不貲縣官所不能給科
率調發出於六路百餘州之民欲以冀幸不可必成之
功而成之且有後災公獨抗權彊紬衆論其事乃寢以
是為吏部久不遷五年三月兼侍讀五月除翰林學士

時初詔經筵官邇英講讀畢留對公首進言分別邪正自古所難唯察言觀行攷其事實所謂正直之人或天資亮直或家世忠義或有志報國或自立名節所謂奸邪之人或逢迎上意或希合權貴或性識頗僻或冀望寵利凡此二端其情非一不可徧舉於是疏其條目導人主以某事者為公正某事者為奸邪以類相反凡二十條願畱聖意推此事類以觀人情則邪正可分而聰明無惑矣上深嘉納公每進讀凡所以啓迪人主皆仁

義之意與夫前古治亂安危之迹其說以修身正心任
賢容諫慎賞罰重守長勸農桑安邊恤民為要皆見於
章疏至於造膝面啓必反覆陳之歲旱以仁宗寶訓三
事進且請詔臣僚直言得失罷五月朔視朝以避正殿
詔太官減膳以示貶損又曰因災異求直言仁祖聖謨
也陛下即位之始嘗降詔求言逮今五六年一日萬幾
四海九州之廣豈無一夫不獲一事失當形于人言從
而修之下可以感人心上可以消天變可不務乎高麗

屢入貢所在不無煩擾公奏待之之禮宜損于前俟其
欲辭勿復留止且不遣報使使天下曉然知陛下以安
遠為令德不以來遠崇虛名知元祐六年貢舉奏罷參
詳官除龍圖閣學士權知開封府始視事留獄無慮千
人公審覈精敏未及月庭無留事凡為開封者多畧細
務公獨省民事如他州日閱牒訴五百號未盡五月盜
賊畏爭訟息獄無繫者僚屬請以圖空言公曰千里之
縣而無一人之獄此上德所格豈守臣之功耶固請不

聽復召入翰林兼侍讀轉對援祖宗故事幸國子監謁
文宣王召儒臣講說請上視學從之七年六月拜中書
侍郎既輔政知無不為是歲郊祀禮官議合祭以昊天
有成命為言公曰先帝定南北郊辨天地之祀此三代
之禮也奈何復欲合祭於圜丘乎昊天有成命乃祀天
祭地皆歌此詩故曰郊祀天地亦如噫嘻春夏祈穀於
上帝豈春夏亦合為一祭也哉三省樞府凡八人唯公
獨為是說爭論不已公曰非天子不議禮諸公豈可輕

變耶久之辯於上前宰執皆言范某之言禮經也然上始郊祀宜並見天地公乃已熙河帥范育累奏鄂特凌古酷暴且久病族帳怨叛願降附乞招納河南八族開拓數千里之地坐獲數十萬之衆大臣欲從之公力爭言於上曰中國納夷狄之叛理固不順今鄂特凌古未有過溫錫沁輩叛否未可知若發兵應援先伐鄂特凌古降者不能必而無釁者先動矣大臣曰外事不可踰度姑使專之而責其成功公曰此雖漢武間之亦不為也初公

在翰林范育請以趙純忠節度青唐代鄂特凌古如拒抗
即討之公奏曰彼自相殘以來求哀當從而綏之示我
恩信此守在四夷之道豈可遣人刺候聞有離貳遂選
置蕃官而代之耶安得聽順而受代也臣恐邊臣之功
未必毫髮徒啓夏國唇齒之隙狼子不伏之心及是再
請公獨不從其後八族竟無降者而鄂特凌古恭順如前
日育又奏進築舒策納密結中龍川三城大臣肆其謀
樞府亦欲連書以上公曰此必爭之地我既城之賊馬

時出居民豈得安全後欲棄之則城費已甚必不可與
邊禍何時而息况版築之初蕃寇衝突勝敗未可知耶
公於禦邊不欲生事上多開納水官陰為回河之計增
隄防進緡埽公固守前議又奏曰水官壅遏北流歲月
既久洪流湍迅安得不激射奔赴東流而東流不能吞
納為禍必轉大不數月東流決清豐復北入內黃而德
清軍實被水患如公言公罷政之明年朝廷又命中書
舍人呂希純殿中侍御史井亮采同案視亦無以易公

之議距公初使凡八年右相蘇公稽留除書以言者罷
公曰同省也責不可逭蘇公制下即待罪累章請補外
以資政殿學士知河中府徙知河陽河南寢疾薨士大
夫知公者莫不哭之慟公天資純良內剛外和始筮仕
慨然有經濟之意及在言職歷侍從位廊廟所言所行
必窮盡義理好賢樂善以人才為急聞一善喜若已有
性清約好施與自奉養如寒士而親戚族屬之貧者喪
葬嫁娶必待而後具與人交始終如一立朝有本末要


之至誠而已嘗語人曰吾於朋友未嘗為欺也況事君乎平生不畏彊禦故多忤權勢無左右之助及大用數可否事論議不少貶以是不暮歲而罷好學終身不釋卷經術尤長於詩文章精醇典麗有古人氣格所著詩傳二十卷文集五十卷內制集五卷外制集三卷奏議十卷娶趙氏屯田郎中贈金紫光祿大夫宗古之女追封蜀郡夫人再娶宋氏職方貢外郎端平之女追封蜀郡夫人七子祖德右宣德郎勾當京東下卸司祖修右

承務郎勾當嵩山崇福宮祖述右承奉郎勾當西京糧料院祖義雄州軍事推官知開封府祥符縣丞皆謹厚而文祖德祖述屢薦試禮部祖義登進士第祖和右承奉郎祖臨祖言未官皆幼三女長適鄧州司法參軍鮮于羣次未嫁孫男十三人澤湜翼浹測洌渢渢澹滌液渢渢激女十一人前葬太學博士杜敏求狀公行事將上之太常史官諸孤請銘諸壙中祖禹少受學於公先公深友愛常曰汝季父所為皆可法上之視學祖禹與勸

講邇英及公入侍祖禹固避不獲命父子先後讀講或同進對獻納左右公既輔政祖禹繼召為學士懇避得請公出藩上恩復申前命與公同奉內朝凡五年及出守陝將省公於洛而薨訃至何痛如之惟古之君子論譏其前人之美而銘之後世乃撫杜君之狀取其繫朝廷大者傳信紀實不溢不誣哭而銘曰

惟我范氏陶唐之裔自蜀成都世顯以儒公來造廷英祖親策言人所難帝獎其直入補袞職神考欽明蹇蹇

匪躬帝諒其誠置諸左史以遺聖嗣乃贊書命乃議祥
刑必本於仁必正於經河決而北朔方其咨二聖命公
往視所宜行其無事惟禹是師敷文禁林入侍經幄辨
別忠邪以裨聖學中書基命考慎其人登貳宰司帝屬
良臣公拜稽首惟艱于茲在始慎微庶終不墮事有可
否惟獻替之秉義執德匪石不移入輔出藩四國其治
天奪之年不究厥位有洛之南實惟土中刻銘幽宮以
詔無窮



范太史集卷四十四

欽定四庫全書

集部

范太史集卷四十五
六

詳校官庶吉士臣何道沖

檢討臣何思鈞覆勘

總校官進士臣楊懋珩

校對官中書臣嵇承志

謄錄監生臣蔣錦城

欽定四庫全書

范太史集卷四十五

宋 范祖禹 撰

皇族墓誌銘

保州防禦使贈崇信軍節度使房國公墓誌銘

公諱仲洽字景和曾祖魏王元佐太宗之子祖允升平
陽郡王考宗回崇信軍節度觀察留後漢東郡公妣李
氏隴西郡君公幼聰敏謹重不妄語笑初賜名授太子
右內率府副率歷右監門率府率右千牛衛將軍求師

擇友專精於詩書積十餘年或勸其就試於有司公曰
讀書學古足以治吾身而已安可干國之賞耶改右監
門衛大將軍領昌州刺史漢東捐館居喪哭泣幾失明
遷均州團練使丁母憂號毀聞者傷之乞守墳百日宗
正以例不許公遣長子士瞻以狀詣丞相府力請朝廷
憫其懇切從之遂為定制宗室守墳自公始於是伏處
墓次布衣蔬食至卒哭則形體殆無人色咸稱其孝制
詔曰銜恤既久善喪有聞今上即位遷右金吾衛大將

軍開州防禦使改領保州刺史本州防禦使元祐七年十月十四日卒年五十有三遺命薄葬贈崇信軍節度使房國公公天資儉約無聲樂玩好家多藏書手不釋卷雖居私室必歛衽正席內外肅然無敢犯者奉朝請四十餘年未嘗有小失娶王氏封和政郡君贈中書令秦王審琦之曾孫先公九年卒和政事舅姑以孝聞嘗割股愈姑之疾論者以配公之德為宜四男一早亡曰士瞻右內率府副率曰士懷曰士輓皆左班殿直十女

三早亡長適左班殿直劉建中次適左侍禁劉佃次適承務郎樊彥和次適田珣次適焦元叔次適范陶皆三班奉職餘在室孫男四人女一人九年二月己酉葬河南永安縣銘曰

翼翼房公率履自躬一其初終惟孝惟恭稽其德行宗室曾閔子孫不忘萬石之謹

右金吾衛大將軍原州防禦使墓誌銘

公諱世復字希靜曾祖德芳楚康惠王祖惟能集慶軍

節度觀察留後南康郡公父從贄鄧州觀察使南陽侯
母會稽郡夫人康氏所生母陸氏封安福縣太君初賜
名授太子右內率府副率歷右監門率府率右千牛衛
將軍右監門衛大將軍右武衛大將軍衡州刺史右羽
林大將軍吉州團練使坐罪非自犯奪官二等未幾還
一等官又數年復舊官遷右金吾衛大將軍原州防禦
使公性剛嚴治家整肅事親孝事長順發言質直無少
阿曲留意圖史通尚書大義仁宗嘗賜御書十二軸有

忠孝世復字希靜七字公嘗集三聖宸筆草字兩進於
上寵賚金帛元祐二年十月葬安福君往來墓次冒寒
感疾明年四月八日卒年五十有四娶姚氏右千牛衛
上將軍宗望之女封河東縣君十二男曰令匹太子右
內率府副率曰令逌贈徐州觀察使曰令介太子右內
率府副率皆卒曰令涖右侍禁曰令宁左班殿直監常
州鹽稅七人皆未賜名而卒女十五人長適右侍禁郭
譯次適東頭供奉官姚彥輔次適奉職張敦皆卒次適

內殿承制陳仲立次適故右侍禁劉俟次適前舒州桐
城縣主簿張祁次適三班奉職史厚躬次適奉職耿之
常六人在室而亡一人幼在室孫男六人曰子謹三班
奉職次皆幼孫女七人長適奉職袁弼次皆幼九年二
月己酉葬河南永安縣銘曰

仁皇手札以寵宗親公得之多禮異羣臣惟其忠孝行
本諸身

右監門衛大將軍贈眉州防禦使追封通義侯

墓誌銘

侯諱仲科字師哲魯恭靖王元份之曾孫信安僖簡王
允寧之孫韓榮思王宗諤之第八子母韓國夫人馮氏
所生母仁和縣太君閻氏初賜名授右內率府副率歷
右監門率府率右千牛衛將軍右監門衛大將軍侯少
好學通五經專治尚書以喪服未嘗一試孝敬友悌性
寬厚樂施予侍韓王夫人疾衣不解帶者各踰旬浹居
喪致哀如禮所生母卒以毀得疾元祐五年四月二十

八日卒年三十有二娶劉氏皇城使永吉之女也封嘉興縣君二男曰士泚曰士陴皆左班殿直女一人幼九年二月己酉葬河南永安縣銘曰

振振宗子孝敬友悌刻意藝文曾未一試從祔九原永齋此志

右金吾衛大將軍慶州防禦使墓誌銘

公諱令茗字曼叔曾祖惟忠贈彰化軍節度觀察留後舒國公祖從藹贈武勝軍節度觀察留後韓國公父世

本贈武寧軍節度觀察留後彭城郡公母張氏安定縣君初賜名補率府副率累遷鳳州團練使慶州防禦使卒於元祐七年五月二十一日年四十有四公性聰敏好學博通羣書喜為詩不尚華采初葬彭城公有司穿壙于陰穴既畢而公知之累表請改卜朝廷以既定不可易特置角堠以識其名母夫人疾藥必親嘗而後進居喪毀瘠表乞廬墓遂感疾而終娶吳氏封永福縣君九男曰子筌率府副率曰子隆右班殿直曰子遵三班

奉職曰子遡子適未仕餘皆夭十女太和縣令吳罕右
班殿直張永錫右班殿直陳頤三班借職李縝三班奉
職吳披其壻也二在室三早亡孫女三人二早夭九年
二月己酉葬河南永安縣銘曰

生於軒冕樂在名教君子之行維民則儆系此銘詩以
彰純孝

右武衛大將軍吉州團練使墓誌銘

侯諱令瞿字思聖彰化軍節度使舒國公惟忠之曾孫

定州觀察使博陵侯從質之孫右屯衛大將軍世鎮之
子母長安縣君周氏初賜名補率府副率歷右監門率
府率右千牛衛將軍右監門衛大將軍右武衛大將軍
和州刺史吉州團練使元祐四年四月九日卒於昭化
坊私第年三十有八侯幼時事母以孝聞好學博通經
史善為歌詩工筆札宗室碑刻多請侯書娶郭氏封太
康縣君一男曰子完三班奉職三女適三班奉職梁允
明三班借職張克侁故進士王舜欽九年二月己酉葬

河南永安縣銘曰

昔漢東平為善以顯惟侯克孝文藝勉勉弗克庸顯喪此邦彥

右武衛大將軍秀州團練使墓誌銘

侯諱令魏字君則彰化軍節度使舒國公惟忠之曾孫
萊州防禦使東萊侯從恪之孫武寧軍節度觀察留後
魯國公世規之子母涇陽縣君和氏初賜名補太子右
內率府副率歷右監門率府率右千牛衛將軍右監門

衛大將軍右武衛大將軍澤州刺史秀州團練使初魯公譽望為宗室一時之冠處身正家悉有法度每聞昕鼓必先至學館族人無敢後者英宗建宮學取以為法侯克紹先德敦厚莊謹不妄言笑好讀書篤志於學性尚儉素居處苟安而已治家以嚴中外敬憚子孫在側雖聞燕必正立拱手平居終日容貌端肅魯公薨執喪哀毀元豐中兩乞試以暮服不得就元祐六年十二月二十七日卒年四十有三娶劉氏封永泰縣君五男曰

子綏右班殿直曰子絳三班奉職曰子維曰子縝曰子綽九女左班殿直李球張濟右班殿直王澈左班殿直孟滋太廟齋郎王子充其壻也孟氏女早卒四在室孫女一人九年二月己酉葬河南永安縣銘曰

翼翼魯公宗室之冠思古僖侯興學自泮廣陵嗣音亦廣德心弗試而隕流風可欽

左朝請郎通判亳州軍州事墓誌銘

君諱令懇字懇之冀康孝王惟吉之曾孫楚國僖安公

守巽之孫濱州防禦使贈開府儀同三司敦惠公世該
之子母南陽縣君李氏繼曰壽昌縣君李氏初賜名令
始補太子右內率府副率歷右監門率府率試換朝請
大夫太子中允監北京糧料院改太常丞監在京倉官
制行改奉議郎遷承議郎丁開府憂服除監進奏院改
今名今上登極轉朝奉郎簽書鎮海軍判官遷朝散郎
通判亳州轉左朝請郎君幼不戲弄長嗜書力學不倦
每厭官邸思有所效用其材神宗之初許宗室補外官

得召試學士院換文資初至北京人謂宗子長於富貴
必不事事君清慎廉勤過於寒素監司交薦之丁開府
憂既除喪家財一毫不取或以為言君曰吾不忍父母
歿而與兄弟競財也歷官十五年所居見稱性無他好
雖在職未嘗廢書歷代史皆手抄精筆札工篆籀善為
尺牘而恬於勢利未嘗謁公卿之門人或勸之君曰富
貴儻有不假妄求命若止此求之何益聞者賢之元祐
七年二月二十八日卒於亳州官舍年四十有一娶田

氏贈太師中書令欽祚之孫女封秀容縣君二男曰子
意業進士次早夭四女長適成安主簿滑延年一在室
二早亡九年二月己酉葬河南永安縣銘曰

祖宗以來不假名器公族異材終老不試先帝稽古試
以吏事君以文學始逾強仕命不可延亦遂其志

左班殿直墓誌銘

君諱士幅字信之鎮江節度使邠國公允成之曾孫容
州觀察使宗儒之孫右監門衛大將軍坊州刺史仲午

之子母福昌縣君王氏以父蔭補右班殿直改左班少
涉學頗能詩性有巧思監相州臨漳鹽酒稅勤於吏職
未幾課增羨元祐八年六月七日卒年二十有五娶王
氏二男一女皆幼九年二月己酉葬河南永安縣銘曰
吏事惟勤緣飾以文壽雖不遐亦克有聞

左班殿直墓誌銘

君諱令泌集慶軍節度觀察留後惟能之曾孫保靜軍
節度使同中書門下平章事遂寧郡王從古之孫右監

門衛大將軍嘉州刺史世設之子母永嘉縣君程氏初
賜名補授右班殿直改左班補外任監鄆城酒稅元祐
六年六月七日卒於官年二十娶田氏九年二月己酉
葬河南永安縣銘曰

振振王孫試吏以勤既冠而隕未克有聞

右侍禁妻王氏墓誌銘

君王氏開封人曾祖亮洛苑使祖察西頭供奉官父復
供備庫副使母壽安縣君趙氏君既筭適宗室右侍禁

令組元祐元年七月二十五日卒年十八君資性柔明
服勤婦道善於女工不妄笑語檢身以禮居家以儉事
上接下為人所稱二男曰子權次未名闕女幼九年二
月已酉葬河南永安縣銘曰

宜其家室惟儉以勤年則不永婦德有聞

安化軍節度使榮國公妻馮翊縣君郭氏墓誌

銘

夫人郭氏曾祖密贈保順軍節度使祖守信贈右監門

衛將軍考琮贈左領軍衛將軍夫人年十六適安化軍節度使榮國安恪公仲玘封馮翊縣君事舅姑晨昏有常節接夫相敬如賓榮公薨罄其資裝盡禮以葬撫育諸子隆于慈愛而其情均一子士宁將赴官亳州夫人與之訣曰吾不復見汝矣左右皆怪之不一月而感疾元祐二年五月十八日卒年五十有四五男曰士伾早卒贈右屯衛將軍曰士歸右武衛大將軍嘉州刺史曰士蕃右武衛大將軍端州刺史曰士彫右監門率府率

卒曰士汙右侍禁三女長適東頭供奉官田良彥次適
右班殿直唐振次適假承務郎周諲孫男五人曰不疑
右監門率府率曰不佞未仕曰不晦曰不厭皆三班奉
職次未名孫女十人九年二月己酉葬河南永安縣銘
曰

為婦孝敬為母慈愛子孫誥誥福祿未艾宜享眉壽養
不可待

華州觀察使妻永福縣君郭氏墓誌銘

君郭氏唐尚父子儀之後曾祖守信贈太傅祖世隆贈太子少師父承顏贈左清道率府率年二十適華州觀察使仲寂入門而娣姒皆喜受饋而舅姑交慶觀察捐館守孀育孤凡二十年左右媵侍常假以顏色內外親戚不覺有薄厚御僕使治居第皆有條理宗族稱之多取法焉元祐五年六月二十五日卒年四十有五男長早卒曰士衆右監門率府率卒贈左領軍曰士編右監門衛大將軍榮州刺史以力學登科第曰士筆士俛

皆右侍禁居官有稱皆君之善教云五女長適左侍禁
王植次適節度推官王璋次幼亡次適左班殿直霍祥
卒次適假承務郎陳敏求孫男四人曰不匿曰不虛皆
三班奉職餘未仕孫女八人長適三班借職朱輔國餘
皆幼九年二月己酉葬河南永安縣銘曰

尚父在唐功格于天覃延厥後其慶綿綿歸於公族宜
其家室為父為母皆可矜式

右監門衛大將軍妻長安縣君蔚氏墓誌銘

君蔚氏曾祖興四廂都虞候贈太師祖昭敏殿前都指揮使贈太師中書令考保用東染院副使贈左領軍上將軍君幼喪父母萬年縣君李氏攜之改嫁宋氏既笄歸監門衛大將軍贈懷州防禦使河內侯仲謙封長安縣君河內侯好學構閣於邸中以藏書君助而成之聞別院樂聲則曰淫哇之音吾家不可有也河內侯卒君教諸子專以經史斥出服御華靡敦尚儉素以至終身元祐二年七月二十三日卒年五十男六人曰士見右

監門率府率卒曰士奄右監門衛大將軍次早亡曰士
域右內率府副率卒次二人早亡六女長適西頭供奉
官彭珪次適左侍禁曹希仲次早亡次適河清主簿楊
元振次適順陽縣尉任綽次適莒縣尉夏琦孫男六人
曰不傲三班奉職曰不忼曰不求卒曰不撓曰不屈曰
不妄卒孫女二人皆早夭九年二月己酉葬河南永安
縣銘曰

助夫藏書惡鄰好樂以此治家勤儉素樸思古賢淑九

原作

右監門衛大將軍妻長壽縣君李氏墓誌銘

君李氏開封人曾祖繼隆贈太師尚書令楚國公祖昭
亮贈太師尚書令崇國公考惟賞右驎驥副使母曹氏
譙郡君君幼孤鞠於兄嫂性和靜處於閨室雖嫻戚罕
獲見自恨幼失怙恃每時節忌日哀號不食家人稱其
孝年二十歸右監門衛大將軍仲戡奉其姑榮國夫人
盡婦道居夫室未嘗厲聲宗族疏戚交譽其美元祐二

年十月二十六日卒年二十有四一男曰士位右班殿直七女皆幼九年二月己酉葬河南永安縣銘曰

顯顯令族作配宜家孝敬淑慎壽考弗遐

太子右監門率府率妻張氏墓誌銘

君張氏浚儀人曾祖堯封贈太師祖化基觀察使考守素國子博士君幼孤養于伯父左藏庫使守誠伯母宜春縣主性孝謹伯父母愛之過於己女年十八歸太子右監門率府率仲璵事舅姑盡禮與家人上下雍睦率

府好學君常勉之治家有法服用節儉女工不矜巧婦
容不尚侈居則嚴整淡如也元祐八年五月十四日卒
年二十有七四男曰士沐士滄皆右班殿直二未賜名
五女四尚幼第二女早夭九年二月己酉葬河南永安
縣銘曰

婦有四德持以靜專宜享遐壽云胡不延

右武衛大將軍康州團練使妻安平縣君江氏

墓誌銘

君江氏開封人曾祖文溥儀鸞副使祖規揚州司理參
軍父惟善西頭供奉官年十六歸右武衛大將軍康州
團練使士競封安平縣君與康州皆好佛書悟空理緝
室異處外世事屏紛華以清靜為樂及疾家人出珠璣
錦繡之服將為斂具君却之易以常服乃受元祐五年
六月八日卒年三十有六二男曰不溢曰不匱皆右班
殿直二女長適進士李絳次幼九年二月己酉葬河南
永安縣銘曰

婦道專靜亦克盡性屬續弗華其終以正

右監門衛大將軍吉州刺史妻安福縣君王氏

墓誌銘

君王氏開封人曾祖承休贈左金吾衛上將軍祖世範
左驍衛將軍父克敦內殿承制母杜氏永和縣君年十
五歸青州觀察使仲覽之子士戴為介婦與其如協力
治內事奉舅姑孝敬接姻族柔順待夫以禮而敦睦御
妾以嚴而不忌奉身以約而不華元祐五年十二月七

日卒年二十有八五男曰不倦早卒曰不僊三班奉職
曰不損曰不俅曰不作皆幼二女長在室次早夭九年
二月己酉葬河南永安縣銘曰

宜其宗家惟孝以勤弗克壽考婦德有聞

右武衛大將軍榮州刺史妻大寧縣君花氏墓

誌銘

君花氏開封人父永安左班殿直君年十八適右武衛
大將軍榮州刺史令羣為繼室封大寧縣君事舅姑孝

謹奉祭祀嚴敬接族人以睦為繼母以慈宗室稱焉元祐八年五月十日卒年二十有七五男曰子建三班奉職卒曰子延三班奉職次早夭曰子佐曰子某七女皆在室九年二月己酉葬河南永安縣銘曰為婦孝敬為母均一是惟可銘以賁幽室

范太史集卷四十五

欽定四庫全書

范太史集卷四十六

宋 范祖禹 撰

皇族墓誌銘

左承議郎妻崇德縣君宋氏墓誌銘

君宋氏七世祖太子太師蔡國公彥筠有功于五代時
退老及國初為開封人曾祖文質贈左屯衛將軍祖世
寧西頭供奉官考良肱左侍禁君年十八適太子右監
門率府率令時賜霞帔服率府少孤貧力學欲以立名

君喜悉捐簪珥繫悅易書史輔成其志元豐初禁士子
游宗室甚率府表乞就學外第宗老大人皆不欲率府
不敢違君力勸之乃得出諸常與往來者厚具待之客
不知其貧未幾疾革聞大宗正方審察率府文藝上朝
廷謂宗人曰延吾數日聞召命足矣卒年二十有一實
元豐八年十二月二十日既卒率府召試祕書省中等
換授通直郎賜五品服今為左承議郎光祿寺丞追封
崇德縣君君性靜慧喜翰墨博誦浮屠書戒家人不殺

生物初羣居族人會廟中有以侈服相尚者君曰新婦家故薄今奉孀姑縫衣裳外不敢及其他的也由是尊老皆敬之教諸女諸婦必以君為言侍姑壽光太夫人四年恭恪無間言一男曰志女元阿秀後君一年卒元祐九年二月己酉葬河南永安縣銘曰

樂羊斷織勉夫以學聞君之風死者可作如彼稽田勤而弗獲

左班殿直妻王氏墓誌銘

君王氏父德用杭州助教母張氏年十六適左班殿直
士屹性柔淑奉舅姑惟勤能睦其族人精于音律女工
之事元祐五年三月十五日卒年一十九男早夭九年
二月己酉葬河南永安縣銘曰

作嬪于宗孝敬睦嫻云何不淑早隕厥身

左班殿直妻魏氏墓誌銘

君魏氏曾祖杲贈左驍衛大將軍祖處約贈左金吾衛
上將軍父孝祥左藏庫副使母趙氏平原縣君君既笄

適宗屬左班殿直士穠元祐八年五月二十九日卒年二十四一女始三歲矣九年二月己酉葬河南永安縣

銘曰

懿彼魏姜柔靜順專胡嗇其壽陪祔新阡

右千牛衛將軍妻王氏墓誌銘

君王氏開封人曾祖士安祖諫左班殿直父益試將作監主簿母張氏歸右千牛衛將軍令劬賜霞帔服性溫恭節儉奉身不華主中饋戒殺生物元祐二年七月三

日卒年二十有二男一女皆幼九年二月己酉葬河
南永安縣銘曰

作嬪宗家約禮無華心不違仁壽胡弗遐

右武衛大將軍賀州刺史墓誌銘

侯諱世資字承之越懿王德昭之曾孫舒國公惟忠之
孫楚國安僖公從信第三十四子母孫氏贈富陽郡君
所生母王氏贈永寧縣太君初賜名補太子右內率府
副率歷右監門率府率右千牛衛將軍右監門衛大將

軍右武衛大將軍賀州刺史侯少聰慧長而敏學長於
詩書英宗選置諸宮學官立大小學限以年能記誦試
合格者始遷太學得預聽書時多以大宗正司之試為
難故雖年長者往往多在小學侯尚幼首應格於是宗
室勸勵執經者衆矣神宗選宗子執事太廟衆皆憚讀
冊侯獨以選攝太祝寢疾誠其子曰吾雖無奇節亦自
省無大過汝曹慎勿以富貴自驕元祐七年三月十二
日卒年四十有一初娶李氏振武軍節度使璋之女封

仁和縣君再娶賈氏供備庫使世京之女封崇德縣君
七男曰令錯曰令黷皆右班殿直曰令卷左班殿直曰
令紆右班殿直三人未名五女三人早卒二在室九年
二月己酉葬河南永安縣銘曰

於皇神考永世克孝相維宗子駿奔在廟平陽冊祝維
德馨香肅恭神人令聞不忘

右武衛大將軍嘉州刺史墓誌銘

侯諱世職字叔良越懿王德昭之曾孫彰化軍節度使

舒國公惟忠之孫保寧軍節度使楚國安僖公從信之
第二十六子母孫氏富陽郡君所生母徐氏太寧縣太
君初賜名補率府副率歷右監門率府率右千牛衛將
軍右監門衛大將軍右武衛大將軍嘉州刺史侯性警
敏髫髻就學宗藩器之年十二安僖公嘗會宮傅侯侍
坐賓戲之曰聞好讀書有何事侯即對曰資父事君忠
孝而已安僖公深嗟賞及長無侈靡玩好之欲聚書至
千餘帙名儒碩學之士多從之游趣尚清遠不屑世務

志在多識前言往行經籍自娛而已富陽夫人疾亟侍藥衣不解帶灼臂灌頂禱請備至由是崇信佛教深戒殺生居喪哀毀骨立及葬遇大雪跣扶匱行數十里哀感行路晚而好禪宗之學棲心真寂不復茹葷超然有遺俗之意為贊頌至二三百篇曰通明集元祐元年閏二月二十日卒年三十有九支體柔弱如生內外異之娶陳氏南康王洪進之裔右侍禁宗誨之女封壽安縣君自寡居不御脂澤常服大練非祭祀賓客酒肉不陳

於前送迎不踰閫能守侯之家法四男長未賜名卒曰
令流曰令丙並右班殿直曰令玕左班殿直九女亡者
四人第二女適陳寧之次適王正臣第五女適王存皆
三班奉職一在室九年二月己酉葬河南永安縣銘曰
疊疊東陽敏學而文惟孝惟忠事父事君非苟知之亦
行之勤刑于室家壺範有聞

右武衛大將軍康州防禦使墓誌銘

公諱令倫字順之昭信軍節度使英國公惟憲之曾孫

全州觀察使新興侯從郁之孫虔州觀察使南康侯世奕之子母王氏河南縣君初賜名補太子右內率府副率歷右監門率府率右千牛衛將軍右監門衛大將軍濱州刺史右武衛大將軍貴州團練使康州防禦使公幼而穎悟喜讀書不好弄動靜語默如成人居父喪哀毀瘠過制事母以孝聞夙夜強學日誦數百言書無所不觀尤工律詩肄業之餘間以習射仁宗嘗試賜弓矢以寵之御家有法閨門嚴肅為人沈厚詳雅趨進應對

從容可觀天資清約飲食衣服不事華侈及祭祀賓客
則致其豐美素嗜唐史成癖嘗語諸子曰汝曹將補外
官當務清白兢慎勿為諂佞貪汙吾每觀李勉林甫之
行事正邪如白黑誠宗臣之鑑戒也元祐八年五月壬
寅卒年四十有九娶安氏封安福縣君十一男曰子西
右監門衛大將軍秀州刺史次未名而卒曰子晉左班
殿直曰子噩右班殿直曰子平子貢並早卒曰子亞子
霖並三班奉職曰子工子丙子亘皆早夭九女長適左

班殿直王冕次適左侍禁張宗晟次適左班殿直王偁
次適右班殿直倪圭次適右班殿直張克和次三人早
卒一幼在室孫男三人彥國左班殿直彥輔彥迪未仕
孫女二人九年二月己酉葬河南永安縣銘曰

彬彬公子敏學而藝帝錫弓矢魯邦分器尚論古人以
詔子弟厥鑑不遠在唐之世

右千牛衛將軍妻劉氏墓誌銘

君劉氏開封人曾祖懷懿南作坊副使祖用可閤門祇

侯贈左千牛衛將軍父漢卿內殿崇班母崇德縣君趙氏年十五適右千牛衛將軍令振奉舅姑盡婦道事夫以禮閨門雍睦元祐二年正月癸亥卒年二十有一二女皆幼九年二月己酉葬河南永安縣銘曰

士會適秦其處為劉遙遙厥後有嫁公侯睦睦其榮忽掩諸幽

皇城使榮州團練使墓誌銘

侯諱仲鞞字子儀魏恭憲王元佐之曾孫密國公允信

之孫祁國公宗說之子母張氏封清河縣君初賜名補
太子右內率府副率歷率府率右千牛衛將軍右監門
衛大將軍右武衛大將軍瓊州刺史西作坊使左驕驥
使皇城使榮州團練使侯好學不事豪靡為人坦夷睦
于宗族博物多能技藝無所不通熙寧中詔宗子服屬
疎遠者得補外官授曹州兵馬都監任滿除許州兵馬
鈐轄又歷鄆潁二州曹素多盜侯設方計督捕盜發輒
得終侯去無留患人賴以安許有殺一家數人而亡去

吏不能得侯逐捕指其家執之曰此殺人者也驗之果
服在鄆及潁前後守將及部使者以事諉之類得辨治
故多薦之者行營場閱軍士會天大寒疾作不少輟元
祐二年正月癸亥卒於潁之官舍年五十贈密州觀察
使追封高密侯娶劉氏封永安縣君繼室錢氏封仁和
縣君八男曰士冰曰士兢皆西京左藏庫使曰士穩莊
宅副使曰士訐右侍禁曰士桴左班殿直餘早卒九女
長適內殿崇班程保民次適右侍禁彭寅次適西頭供

奉官劉公亮次適曹州濟陰縣主簿顏幾道次適三班
奉職應發一在室餘早夭孫男十三人不輒不疑皆三
班奉職不惑不輕皆三班借職不輟不慙不悔不茹不
倦不偏不傳不瑒未仕孫女七人曾孫男一人善孜曾
孫女一人皆幼九年二月己酉葬河南永安縣銘曰
矯矯公子出而試吏智則有餘莫不辦治夙夜匪懈以
身徇公卒為宗藩有貴其終

右監門衛大將軍妻王氏墓誌銘

君王氏京師人曾祖堯基贈驍衛上將軍祖諤文思副
使父瞳東頭供奉官母趙氏君端麗聰穎喜讀書善為
歌詩精于筆札父嘗奇之年十六適北海郡王之子右
監門衛大將軍仲塏内外宗族莫不宜之父監通州酒
稅君出送悲泣而返數日不食憂思感疾元祐元年四
月癸巳卒年二十男女各一人皆夭九年二月己酉葬
河南永安縣銘曰

女子有行遠父母兄弟夫豈不思自約以禮之子于歸

出祖其親卒以憂隕觀過知仁

定國軍節度觀察留後追封東陽郡王墓誌銘
王諱仲暄字子華曾祖魯恭靖王祖濮安懿王考沂國
公宗詠王沂公長子也母杜氏河南郡夫人初賜名授
太子右內率府副率歷率府率右千牛衛將軍右監門
衛大將軍右武衛大將軍康州刺史忠州團練使濮王
三夫人祔濮園預從行還拜潭州觀察使今上即位遷
定國軍節度觀察留後初杜夫人娠王七月而生幼多

疾不好弄及長儀質端謹性寬而和事上知禮節居家
不妄言笑既富且貴奉已尤儉約無聲樂妓妾玩好嗜
慾一不以經心平居掃一室終日坐寐其間幽閒閒寂
常人所不堪王處之泊如也或勸王曰身為侯伯屬籍
親近而所養太薄奚至自苦如此耶王正色曰世人有
不免飢寒者吾為宗室賴祖宗之德致位豐顯其獲溫
飽為幸厚矣安可為侈汰之事哉每朝廷加官錫賚命
既下王憮然曰我不幸有負薪之疾力不足以奉朝請

高爵重祿自取便安死有餘責矣元祐元年七月病劇以聞天子命中貴人挾太醫診治太皇太后撫問尤至癸酉薨年四十有五兩宮傷悼遣內人致奠賻錫加等贈保寧軍節度使追封東陽郡王命入內省供奉官勾當御藥院梁惟簡典治喪事八月己丑具鹵簿鼓吹出殯于城北慶恩佛祠夫人郭氏再娶王氏皆無出終以無嗣九年二月己酉葬河南永安縣銘曰

濮國子孫蕃衍而昌沂卒于公以啓東陽倚嗟東陽幼

極于病澹泊無欲安以順命寵至而懼居逸而憂流連
荒亡爾公爾侯四十五終兩宮所悼孰如王賢而不耆
老王雖無子宗不絕世琢石有文以詔來裔

太子右內率府副率妻呂氏墓誌銘

君呂氏開封人曾祖祐之贈司徒祖士隆贈工部侍郎
考蒙吉太子中舍母伊氏適太子右內率府副率子獻
事舅彭城公以孝和其夫族以睦歲時祭祀躬執饌內
外親族稱為賢婦彭城公薨居喪盡禮元祐二年六月

丁酉卒年二十有三溫恭柔惠寡於言笑未嘗以喜怒
形顏色精於女工誦書歌詩筆札音律不學而能二子
曰伯夷舉進士曰伯通早亡一女亦夭九年二月己酉
葬河南永安縣銘曰

行潦之藻季女尸之寘諸宗室神實饗之庶聞其風命
已亡之

三班奉職墓誌銘

君諱子琦字韞之宣州觀察使宣城侯從謹之曾孫保

寧軍節度使昌國公世享之孫文州團練使令禔之子
母平原縣君陳氏以父任為三班借職遷奉職監汝州
都作院性孝謹平居深默似不能言而臨事明敏居官
夙夜勤職遠家庭數百里畏慎常若在旁元祐八年七
月庚子卒年二十有三娶史氏供奉官永年之女男女
各一人九年二月己酉葬河南永安縣銘曰

其來也孰與之其去也孰奪之宜壽而夭維世之悲

三班奉職妻史氏墓誌銘

君史氏開封人曾祖達左金吾衛大將軍祖青右領軍
衛大將軍父永年西頭供奉官母王氏年十九歸文州
團練使之子三班奉職子琦事舅如父佐夫以法度不
敢懈才六月而卒實元祐六年五月癸未九年二月已
酉葬河南永安縣銘曰

母結其褸夫脫其纓如桃之華菁實未成

右金吾衛大將軍袁州防禦使贈安武軍節度

觀察留後信都郡公墓誌銘

公諱世繁字約之曾祖德昭越安懿王祖惟正同安郡
王考從謹同州觀察使馮翊侯母襄國夫人符氏初賜
名補太子右內率府副率歷右監門率府率千牛衛將
軍右監門衛大將軍右武衛大將軍嘉州刺史台州團
練使右金吾衛大將軍袁州防禦使元祐元年十一月
癸酉薨年四十有五公幼孤疑疑能自立趣操不羣長
而好學嗜書史黃老百家之言無所不觀善歌詩得風
人古雅之思嘉祐中上巳仁宗錫宗室燕命射屢中的

受賞賚仁宗御書守信義不巧作好碩學精六藝十二
字以賜之公持心近厚喜忠孝常戒子弟以燕語無臧
否人物當自顧何如爾有以是非言者必艱然卻之或
曰豈以為妄邪公曰人之言雖真偽雜出大抵生于愛
憎之變吾不願聞也有隸卒喪母貧無以葬盜公白金
以為送具公捕得之置金而釋其罪語人曰吾不欲以
金傷孝子之心所受祿均贍族人之孤遺者率常無餘
襄國夫人喪既殯與昆弟表乞廬于散室卒哭而返著

忠孝錄五卷有歌詩十卷夫人和氏故相凝之後六子
曰令閑右武衛大將軍舒州團練使曰令畎太子右內
率府副率早亡曰令玠右班殿直次未名卒曰令腫左
班殿直次未名卒一女早亡孫男四人子昇承務郎簽
書淮康軍節度判官次未名卒子溫右班殿直次未名
孫女三人長適三班奉職葛達次早亡次幼九年二月
己酉葬河南永安縣銘曰

王孫嗜學仁祖所知賜札丁寧實寵嘉之東平樂善馬

侯戒子寥寥千載公繼其美


右監門率府率贈左領軍衛將軍護軍天水縣

開國子墓誌銘

君諱仲靡字和叔魯恭靖王元份之曾孫濮安懿王之
孫濟陰郡王宗輔之子母惠國夫人裴氏初賜名補太
子右內率府副率遷右監門率府率幼靜默不為遨嬉
既長有志于學丁內難治喪紀奉祭祀盡心竭力不得
遂其學問之志繼以育母嬰疾累年躬親藥膳勤苦憂

戚傷其生之不幸元祐七年四月戊寅感疾卒年二十
有一娶郭氏生二女皆早夭君既歿郭氏服喪盡禮如
君之存九年二月己酉葬河南永安縣銘曰

濮王之孫濟陰之子志于學問惟才之美濯濯嘉禾方
秀而止



范太史集卷四十六